

共同經課 - 1 列王記上二十一章一節~二十一 a 節

1 諸個代誌了後，耶斯列人拿伯有葡萄園佇耶斯列，近撒瑪利亞王亞哈的宮。2 亞哈給拿伯講：「你用你的葡萄園互我，我通做菜園，因為是近佇我的宮；我欲用閣卡好的園給你換，抑是你愛銀，我就照價錢互你。」3 拿伯給亞哈講：「用我的祖所留的業互你，此個代誌願耶和華禁止我。」4 亞哈因為耶斯列人拿伯所講的話，就鬱悴無歡喜倒去伊的厝，因為拿伯曾講「我毋用我的祖業互你」，亞哈就倒佇眠床，面向內面，也唔食。5 王后耶洗別到伊遐問伊講：「你的心內憂悶續唔食，是啥緣故啊？」6 伊給伊講：「因為我對耶斯列人拿伯講：『你用你的葡萄園互我，我用銀互你，抑是你若愛，我就用葡萄園換你』；伊講：『我的葡萄園我毋互你。』」7 王后耶洗別給伊講：「你此陣是啲管理以色列國抑毋是？做你起來食，互你的心歡喜，我欲用耶斯列人拿伯的葡萄園互你。」8 就用亞哈的名寫批，用王的印頓伊，寄許個批互拿伯的城互及伊倚起的長老貴族。9 寫佇批裡講：「恁著宣佈禁食，互拿伯坐佇百姓間的高位；10 閣設二個匪類佇伊的面前，做干證告伊講：『你謗瀆上帝及王』；然後就拖伊出去用石頭擲死伊。」11 伊城內的人，就是倚起彼個城的長老及貴族，就照耶洗別所寄的話，就是照伊寄互 in 的批，所寫的來行，12 宣佈禁食，互拿伯坐佇百姓間的高位。13 彼二個匪類入去，坐佇伊的面前，匪類當百姓的面前做干證告拿伯講：「拿伯謗瀆上帝及王！」就拖伊出城外，用石頭擲死伊。14 就差人去給耶洗別，講：「拿伯已經互石頭擲死啦。」15 耶洗別聽見拿伯互石頭擲死，耶洗別就給亞哈講：「你起來掌耶斯列人拿伯毋肯為著價錢互你的葡萄園！因為拿伯已經死，無命啦！」16 亞哈聽見拿伯已經死，亞哈就起來，落去耶斯列人拿伯的葡萄園遐欲掌伊。17 耶和華的話臨到提斯比人以利亞講：18 「你起來，去見踎佇撒瑪利亞的以色列王亞哈，伊落去拿伯的葡萄園欲掌伊，此陣伊佇遐。19 你著給伊講：『耶和華按呢講：你有剖死人閣掌伊的業嗎？』閣著給伊講：『耶和華按呢講：狗佇甚麼所在舐拿伯的血，狗也欲佇遐舐你的血，就是你本身的血。』」20 亞哈給以利亞講：「我的對敵啊，你尋著我嗎？」伊應講：「我尋著你；因為你賣家己，行耶和華看做歹的事。21 耶和華講：『我欲降災禍互你，欲一盡除你。」

共同經課 - 2 詩篇五篇一節~八節

1 [大衛的詩，交互樂官。用歎的樂器。] 耶和華啊，求你俯耳孔聽我的話，鑑察我的心思！2 我的王我的上帝啊，求你俯落聽我求叫的聲！因為我向你祈禱。3 耶和華啊，早起時你會聽我的聲；早起時我欲對你排列我的心意，續欲瞭望！4 因為你毋是歡喜罪惡的上帝，歹者袂得通及你同倚起。5 驕傲的人袂會倚佇你的面前；做歹的人，攏是你所怨恨。6 講白賊者，你欲滅 in；愛剖人及奸詭者，攏是耶和華所厭惡。7 論到我，我欲憑你豐盛的慈愛入你的厝；我欲存敬畏你的心向你的聖殿來敬拜。8 耶和華啊，求你因為我的對敵，憑你的公義導我，互你的路佇我的面前正直。

共同經課 - 3 加拉太書二章十五節~二十一節

15 咱出世做猶太人，毋是外邦的罪人；16 既然知人得著稱做義毋是對趁律法，獨獨對信耶穌基督，咱也有信靠基督耶穌，互咱對信基督得著稱做義，毋是對趁律法；因為對趁律法無人會得著稱做義。17 今設使咱啲求佇基督得著稱做義，也家己猶久顯出做有罪的人，按呢基督是罪惡的差用嗎？斷斷毋是！18 因為我若閣起我前所毀的，就是表明家己做犯法的人。19 因為我對律法，就向律法已經死，欲互我向上帝來活。20 我曾及基督同釘十字架，我猶久啲活毋是猶原我，就是基督惦佇我啲活；閣我現今佇肉體所有的活，是在佇信上帝的子來活；伊曾疼我，替我獻家己。21 我無廢無上帝的恩典；因為對律法若會得著義，就基督無因端來死。

共同經課 - 4 路加福音七章三十六節~八章三節

36 有一個法利賽人請耶穌相及食；伊就入法利賽人的厝坐桌。37 抵當城內有一個歹婦仁人，知伊坐桌佇法利賽人的厝，就帶貯香油的玉罐來，38 倚佇耶穌的後面，倚伊的腳啲啼哭，有目屎滴澹(tâm)伊的腳，就用伊的頭毛拭伊，閣捷捷啞伊的腳，用香油抹伊。39 請耶穌的法利賽人看見按呢，心內想講：「此人若是先知，的確會知摸伊的人是誰，閣是甚麼號的婦仁人；就是歹人。」40 耶穌應伊講：「西門！我有話欲給你講。」西門講：「先生，請你講。」41 伊就講：「某個債主有二人欠伊的債；一個欠伊五百個銀仔，一個欠伊五十；42 in 既然無通還，債主就赦免 in 二人。按呢，就叨落一個卡疼債主啊？」43 西門應講：「我拍算是彼個互伊赦免卡多的。」耶穌給伊講：「你所斷的是著。」44 就越頭向婦仁人，給西門講：「你看見此個婦仁人無？我入你的厝，你無用水互我洗腳；若是伊用目屎滴澹(tâm)我的腳，用頭毛拭伊。45 你無給我啞；獨獨伊對我入來的時啞我的腳無息。46 你無用油抹我的頭殼；若是伊用香油抹我的腳。47 所以我給你講，伊多多的罪過已經赦免，因為伊的疼是多，若是得著赦免少的，伊的疼也是少。」48 就給婦仁人講：「你的罪赦啦。」49 同桌的人心內講：「此個啲赦罪的是甚麼人。」50 耶穌對婦仁人講：「你的信有救你；做你安心倒去！」1 過無幾日，耶穌四界行逐個城逐個鄉社，宣傳來報揚上帝國的福音。十二個學生也及伊去，2 也有幾若個婦仁人，有的曾患著鬼，有的有破病今已經得著醫好，其中有抹大拉的馬利亞（曾有七個鬼對伊出去），3 閣有希律的管家苦撒的某約亞拿，閣有蘇撒拿，以外猶有多多婦仁人，攏用 in 所有的來服事 in。